

唐伯虎先生集

唐伯虎集序

吾吳伯虎唐先生以風流跌宕
擅名一時厥後輾轉淪落且歿
議者謂良玉善剖寶劔善割嗟
嗟唐生終已焉哉愚曰不然伯
扁當宸濠物色岢名已敗矣身

已廢矣英雄末路能不自黜者
幾人哉伯虎狎狂自污卒以獲
免此豈風流跌宕之士所能窺
其際乎其殆幾于智者歟謙者
終咎其失足于徐經以爲口實
於戲伯虎尚不失足于宸濠乃

甘以其身徇徐經邪雖然文人
無行自古有之司馬長卿才絕
古今倘畧其才而第指其竊貲
一事則長卿窮矣其是其非曷
足爲唐生咎乎故夫伯虎者風
流跌宕人也蓋有才而不善用

之者也彼自負有才而善用之者強半皆工于鞚悅者也工于鞚悅者不取也則不如伯廂之不事鞚悅而卒以成其爲伯廂者也愚故曰伯廂殆幾于智者也所著詩文翩翩有奇藻乃其

邁逞不屑之韻卓然如埜霍之
在鷄羣是鳥可以無傳哉噫其
傳者亦寡矣

萬曆壬辰春三月旣望吳趨後
學何大成君立題

唐伯虎集序

駁

唐伯虎集序

唐伯虎集二卷樂府詩總三十二首賦二首雜文一十五首內金粉福地賦闕不傳伯虎他詩文甚多體不類此此多初年所作頗宗六朝惟遊金集匡廬嚴陵觀鰲山諸詩及嘯旨後序乃中季所作亦可入選故附入選唐伯虎者名寅初字伯虎後乃更字子畏吳縣人也少有雋材性豪宕不羈家貧不問產業好古文辭與故京兆祝公允明博士徐公禎卿今內翰文公徵明相友善而尤工四六藻思麗逸翩翩有奇

氣然行實放曠人未之奇也獨故太守文公林奇之嘗上書吳文定公寬覽書曰吳安得有此人邪頗爲延譽公卿間而提學御史方誌惡其跣跪將黜之比試故大學士梁公儲讀其文驚歎以爲異材遂薦第一由是穀稱籍甚會試禮部衆擬伯虎復當首選伯虎亦自負江陰徐經者通賄攻官故尚書程公敏政家人得其節目以示伯虎且倩代草文字事露逮錦衣衛獄掠問無狀先是梁公奉使外夷伯虎乞程公文送之竟以此論發爲吏耻不就免歸友人文徵明

以書切責之伯虎答書自明文多載集中乃益自放
廢縱酒落魄所著述多不經思語殊俚淺人或規之
伯虎曰夫太上立德其次立功其次立言寅遭青蠅
之口而蒙白璧之玷爲世所棄雖有顏冉之行終無
以取信於人而夔龍之業亦何以自致徒欲垂空言
傳不朽吾恐子靈劇秦蔡邕附卓李白永王之累子
厚叔文之譏徒增詬辱而已且人生賢適志何用劇
心鏤骨以空言自苦乎宸濠之謀逆欲招致四方材
名之士乃遣人以厚幣招伯虎堅辭不可至則陰知

將有淮南之謀遂徻狂以酒自污宸濠曰唐生妄庸
人耳乃放歸得免於難過富春渚想子陵之風慷慨
悲歌徘徊者久之築室桃花塢中讀書灌園家無擔
石而客嘗滿座風流文采照映江左外若奢汰而中
慕沈玄勤究內典旁精繪事泰童時嘗獲侍高論接
杯酒之歡哲人已遠九京不作撫誦遺文慨仰遐烈
爰加蒐撫庶存梗槩云爾

嘉靖甲午蜡月望日胥臺山人袁泰謹序

唐伯虎集目錄

樂府 一十二首

短歌行

相逢行

出塞 二首

紫驕馬

驄馬驅

俠客

隴頭

隴頭水

咏春江花月夜

春江花月夜 二首

遊宴 一十二首

登吳王郊臺

仲夏三十日奉陪弘農楊禮部丹陽都隱君虎

丘泛舟

遊金山

雋山

廬山

巖灘

聽彈琴瑟

席上答王履吉

觀鰲山

四首

贈送

三首

七夕賦贈織女

答王履吉

送王履約會試

詠懷 三首

白髮

聞蛩

霜中望月悵然興懷

傷悼 二首

夜中思親

傷內

賦 二首

嬌女賦

金粉福地賦 闕

書序誌銘碣碑文 一十五首

上吳天官書

與文徵明書

答文徵明書

嘯旨後序

送文溫州序

中州覽勝序

劉秀才墓志銘

劉太僕墓志銘

吳東妻周令人墓志銘

徐君墓志銘

許天錫妻高氏墓志銘

唐長民壙志

沈隱君墓碣

齊雲巖紫霄宮玄帝碑銘

祭妹文

唐伯虎集目錄

跋

唐伯虎先生集卷上



吳趨唐 寅伯虎著

同郡何大成君立校

樂府

短歌行

尊酒前陳欲舉不能感念疇昔氣結心寃日月悠悠
我生告道民言無欺秉燭夜遊昏期在房蟋蟀登堂
伐絲比簧庶永憂傷憂來如絲紛不可治綸山布谷
欲出無岐頰頰若穴爇爇莫絕無言不疾鼠思泣血

霜落飄飄雅栖無冀毛羽單薄雌伏雄號緣子素纓
灑掃中庭躑躅躑躅仰見華星來日苦少去日苦多
民生安樂焉知其他

相逢行

相逢狹邪間車窒馬不旋雖言異鄉縣豈非徃世緣
脫轂且卷鞭高揖問君塵女弟新承寵阿大李延年
何以結歡愛渠益出于闈女蘿與青松本自常已纏綿

出塞二首

烽火照玄菟嫖姚召僕夫朱家薦逋虜刀間出點奴

六郡良家子三輔弛刑徒
茄度烏啼曲旗參兀落圖
寶刀裝鞞琫名駒被鏤渠
撥金出孤竹飛旌掩二榆
妖雲壓亾塞珥月照窮胡
勒兵收日逐潛軍執骨都
姑衍山重禪燕然石再剗
功成肆郊廟雄郡却分符

其二

烽火通麟殿嫖姚拜虎符
馬聲分內廐旗影發前驅
六郡良家子三輔弛刑徒
夜帳傳刁斗秋風感蠅蛄
功成築京觀萬里血糊塗

紫駟馬

紫駟垂素韁光輝照洛陽連錢裁璧玉障泥圖鳳凰
夜赴期門會朝逐羽林郎陰山烽火急展策願超驤

驄馬驅

悠悠驄馬驅道阻歲云晚豈無同裘士念子不能飯
木脫辭故枝去家日已遠鳴鷄戒前道夕暝猶驅寒
筋力已非舊淚下不可卷

俠客

俠客重功名西北請專征慣戰弓刀捷酬知性命輕
孟公好驚座郭解始橫行相將李都尉一夜出平城

隴頭

隴頭寒多風卒伍夜相驚轉戰陰山道暗度受降城
百萬安刀靶千金絡馬纓日晚塵砂合虜騎亂縱橫

隴頭水

隴水分四注隴樹襟雲烟磨刀共斂甲飲馬並投錢
朔地風初合交河水復堅寒禁不能語烏孫掠酒泉

咏春江花月夜

麝月重輪三五夜玉人聯漿出靈娥內家近製橫汾
曲樂府新諧役鄧歌十里花香通綵殿萬枝燈焰照

春波不關仙客饒芳思畫短歡長奈樂何

春江花月夜

二首

嘉樹鬱娑娑燈光月色和春江流粉氣夜水濕裙羅

其二

夜霧沈花樹春江溢月輪驩來意不持樂極詞難陳

遊宴

登吳王郊臺作詩一首

昔人築此不論程今日牛羊向上行吳兒越女齊聲唱菱葉荷花無數生南山含雨眉俱潤西湖暎日掌

平本由萬感銷非易詎言哀樂過群情

仲夏三十日奉陪弘農楊禮部丹陽都隱君虎

丘汎舟作詩一首

朱明麗景屬炎州蘭橈桂楫遂娛遊
逐蔭追颺暫容與回波轉藻若夷
猶日承綺扇釵光發山入仙杯酒
氣柔幸奉瑤糜論所願皓首期言伏此丘

遊金山

孤嶼峻嶒插水心亂流攜酒試登臨
人間道路江南北地上風波世古今
春日客途悲白髮給園兵燹廢

黃金闌黎肯借翻經榻烟雨來聽龍夜吟

隸山

鹿裘高士帝王師井竈猶存舊隱基日轉露臺明野
淑潮隨齋磬韻江湑天從西北開天塹地到東南缺
地維翹首三山何處所卻看身世使人悲

廬山

匡廬山高高幾重山雨山烟濃復濃移家來住屏風
疊騎驢來看香爐峰江上烏帽誰渡水巖際白衣人
採松古句磨崖留歲月讀之漫滅爲修容

嚴灘

漢皇故人釣魚磯
魚磯猶昔世人非
青松滿山響樵斧
白舸落日曬客衣
眠牛立馬誰家牧
鷓鴣鷓鴣無數飛
嗟余漂泊隨饘粥
渺渺江湖何所歸

聽彈琴瑟

高厦列明燈
展瑟復張琴
柔絲亂弱指
遞節赴繁音
寶鴈難齊布
金星合漫尋
相逢且相樂
不惜解羅襟
席上答王履吉

我觀古昔之英雄
慷慨然諾杯酒中
義重生輕歎知

唐作萬年卷一
五
已所以與人成大功我觀今日之才彥交不以心惟
以面面前斟酒酒未寒面未變時心已變匪區已作
老材庄英雄才彥不敢當但恨今人不如古高歌伐
木天滄浪感君稱我爲奇士又言天下無相似庸庸
碌碌我何奇有酒與君斟酌之

觀鰲山 四首

禁籞森嚴夜沈寥燈山忽見翠岩髡六鰲並駕神仙
府雙鵲聯成帝子橋星振珠光鋪錦繡月分金影亂
瓊瑤顧身已自登緱嶺何必秦姬奏洞簫

其二

金吾不禁夜三更寶斧修成月倍明鳳蹴燈枝開夜
殿龍啣火樹照春城蓮花捧上霓裳舞松葉纏成熟
戲棚杯進紫霞君正樂萬民齊口唱昇平

其三

仙殿深巖號太霞寶燈高下綴靈槎沈香連理三珠
樹結綵分行四照花水激葛陂龍化杖月明緱嶺鳳
隨車簫韶沸處開宮扇法仗當墀鴈隊斜

其四

上元佳節麗仙都內殿歡遊愜睿圖
璧際金錢啣鸞鷲
驚水中鐵網出珊瑚
鼓將百戲分爲埽燈把三山挈
入壺不是承恩叅勝賞
歌謠安得繼康衢

贈送

七夕賦贈織女

神雲矯矯月離離
帝子飄颻卽故期
銀堂極夜留魚
鑰珠殿繁更繞鳳旗
靈津駕鵲將言就
咸池沐髮會
令晞含情忍態辭
文席七襄仍弄昨朝綵

伏承履吉王君以長句見贈作此爲答

歲月信言邁吾生已焉休春滋未淹暑退大火流
灑掃庭戶間整飾衣與裘猿鳥樂高蔭攀援聊淹留
仲尼悲執鞭富貴不可求揚朱泣路岐彷徨何所投
送王履約會試

雨雪關河晚風沙鴻鴈來送君將寶劍携手上金臺
錦繡三千牘天人第一才揚雄新賦就聲價重蓬萊
詠懷

白髮

清朝攬明鏡玄首有華絲愴然百感興雨泣忽成悲

憂思固逾度榮衛豈及衰天壽不疑天功名須壯時
涼風中夜發皓日經天馳君子重言行努力以自私

聞蛩

孟夏蟋蟀鳴白露零蔓草四時序相代候物興何早
遊子尚寒襦佇聽傷懷抱隙景無淹晷壯志坐衰老
霜中望月悵然興懷

高天綠色靜沈沈銀月飛光綵霧深來鴻去鴈無留
影鳴機急杵動愁心色連太液珠迷海影照扶桑雪
作林不似王生悲異國自緣風物重霑襟

傷悼二首

夜中思親

玄序潛代運穠華不久鮮
仰視鴻鴈征俯悼丘中賢
迅駕杳難追庭止念周旋
殺身良不惜顧乃二人憐
嘉時羞芟棗涕泗徒留連

傷內

淒淒白露零百卉謝芬芳
槿花易衰歇桂枝就銷亡
幽途無生駕欸欸何從將
曉月麗塵梁白日照春陽
撫景念疇昔肝裂魂飄揚

唐伯虎先生集卷上終

唐伯虎先生集卷下

吳趨唐 寅伯虎著

同郡何大成君立校

賦

嬌女賦

臣居左里有女未婦長壯妖潔聊賴善顧態體多媚
窈窕不妬旣閑巧笑流連雅步二十尚小十四尚大
兄出行賈長嫂持戶日織五丈罷不及暮三丈縫衫
餘剪作袴抱布貿絲厭浥行露負者下擔行者佇路

來歸室中嘖嘖怒策券折閱較索羨貨著屐入被
不食而齷雙耳嘈襍精蕩神怖形之夢寐彷彿曾晤
咀桂嚼杜比像陳賦螭蝮夏蛻額廣平而春蛾出甬
修眉揚而白雲懷山黛浮明而朝星流離目端詳而
華瓠列犀齒微呈而含桃龜膚口欲言而齒齶承露
舌含藏而蝦蟇蝕月顛髮圓而毒蠶搖尾髻含風而
鴉羽齊奮飾梳妝而遊魚吹日口輔良而蝶翅輕暈
鼻端中而恒月沐波大宅黃而琵琶曲項肩削成而
脣齶啣李領文章而霧素一束腰無憑而鼠姑舒合

體修長而酥凝脂結袵微傾而鵝翎半擘爪有光而
玉鈎聯屈指節纖而蓮本雪素臂仍攘而角弭脫鞞
履高墻而輕颺捲霧行寒裳而梨花轉夜睡未明而
溫泉浸玉澡蘭湯而陽和駘蕩醉敖翔而咏曰纏火
齊兮璵木難簪鳴皇兮釵琅玕絡瑟瑟兮銀指環被
珠綬兮龍係臂珮璜而澣兮褶翡翠金裾鈎兮繡曳
地襜黃潤兮袿方空綿倒頓兮玉膏笳綦丹殼兮素
五綜麗炎炎兮倫無雙

金粉福地賦

闕

書序誌銘碣碑文

上吳天官書

寅再拜昔王良適齊投策而嘆歐冶去越折劍言辭
藝不云售慨猶若此况深悲極憤者乎寅夙遭哀閔
室無強親計鹽米圖媾嫁察鷄豚持門戶明星告旦
而百指伺鋪飛鼠啓夕而奔馳未遑秋風飄爾而舉
翩觸隅周道如砥而垂頭伏軀與隸交叱刀錐並侵
烟爨就微顛仆相繼彷徨闔闔之下婆娑閭巷之側
飛塵揚波行人如蟻恫恫悒悒不可與處此乃有生

之憂非寅之所畏也至若檜樹辭榮芳林引暮學書
不成爲箕未貨豔色廢於群醜齊音咻於衆楚鷄旣
鳴矣而飄飄遠遊日云夕矣而契濶寤嘆九衢延絲
而窮轍漣如高門將將而敗刺無從又漢網橫施畧
瑕錄腐駑馬効其馳驅鉛刀礪其銛鏑有志功名之
士扼腕攘袂之秋也若肆目五山揔轡察野橫披六
合縱馳八極撫事悼情慷慨然諾壯氣雲蒸烈志風
合戮長蛻令赤海斷修蛇使丹嶽功成事遂身斃名
立斯亦人生之一快而寅之素期也乃至凍蠅垂翅

絕望驥後斥鷃栖蒿仰思鴻末念言自致力薄羽微
人生若朝露百年猶飛電一旦先犬馬何從効分寸
哉使牛僮躑躅於重基狐狸跳梁於玄窾皮毛並沒
草木同塵雍門援琴吁其傷矣墨子悲絲殊乎昨矣
華省陳筵不可作矣虫悲風暄時代及矣此寅所以
撫案而思仰天而嘆不能不爲之憤悒而哀傷也執
事俊榜魁元清時宰相羔羊有不渝之節鳴鶴得靡
忤之道木鐸警衆魏象詔民裁成風雨旋轉日月朝
廷之師臣海內之人望所謂域中銀斗高標海內瑤

山共仰矣寅瞻桑仰梓得俱井邑感於斯之義冒通
家之請謹錄所著投贄嗟乎平子縉才乃假聲於三
都之賦孟陽後進敢托途於劍閣之銘所以得芻展
豐談直施利筆苟其不爾則前愆併聚後悔何尋寅
竊不料反顧微軀塊然一物若得充後陳之清問被
壁上之餘光則枯骨不朽故敢伏光範門下請教不
勝惶恐之至

與文徵明書

寅白徵明君卿竊嘗聞之累吁可以當泣痛言可以

譬哀故姜氏嘆於室而堅城爲之墮堞荆軻議於朝而壯士爲之徵劍良以情之所感木石動容而事之所激生有不顧也昔每論此廢書而嘆不意今者事集於僕哀哉哀哉此亦命矣俯首自分成喪無日括囊泣血群於鳥獸而吾卿猶以英雄期僕忘其罪累殷勤教督罄竭懷素缺然不報是馬遷之志不達於任侯少卿之心不信於蘇季也計僕少年居身屠酤鼓刀滌皿獲奉吾卿周旋頡頏婆娑皆欲以功名命世不幸多故哀亂相尋父母妻子躡踵而沒喪車屢

駕黃口嗷嗷加僕之宕跌無羈不問生產何有何凶
付之譚笑鳴琴在室坐客長滿而亦能慷慨然諾周
人之急嘗自謂布衣之俠私甚厚曾連先生與朱家
二人爲其言足以抗世而惠足以庇人願賈門下一
卒而悼世之不嘗此士也蕪穢日積門戶衰廢柴車
索帶遂及藍縷猶幸藉朋友之資鄉曲之譽公卿吹
噓援枯就生起骨加肉猥以微名冒東南多士之上
方斯時也薦紳交游舉手相慶將謂僕濫文筆之縱
橫執談論之巨轍岐舌而贊并口而稱墻高基下遂

爲禍的側目在旁而僕不知從容晏笑已在虎口庭
無繁桑具錦百疋讒舌萬丈飛章交加至乎天子
震赫名捕詔獄身貫三木卒吏如虎舉頭搶地淚泗
橫集而後崑山焚如玉石皆燬下流難處惡惡所歸
績絲成網羅狼衆乃食人馬斃切白玉三言變慈母
海內遂以寅爲不齒之士仍拳張膽若赴仇敵知與
不知畢指而唾辱亦甚矣整冠李下掇墨甌中僕雖
聾盲亦知罪也當衡者哀憐其窮黜檢舊章責爲部
郵將使積勞補過循資干祿而遽除戚施俯仰異態

士也可殺不能再辱嗟乎吾卿僕幸同心於執事者
于茲十五年矣錦帶懸髦迫於今日瀝膽濯肝明何
嘗負朋友幽何嘗畏鬼神茲所經由慘毒萬狀眚目
改觀愧色滿面衣隻不可伸履決不可納僮奴據案
夫妻反目舊有獐狗當門而噬反視室中甌甑破缺
衣履之外靡有長物西風鳴枯蕭然羈客嗟嗟咄咄
計無所出將春掇桑椹秋有橡實餘者不迨則寄口
浮屠日願一食蓋不謀其夕也呼歎乎哉如此而不
自引決抱石就木者良自怨恨筋骨柔脆不能挽強

執銳攬荆吳之士劍客大俠獨當一隊爲國家出死
命使功勞可以紀錄乃徒以區區研靡刻削之材而
欲周濟世間又遭不幸原田無歲禍與命期抱毀負
謗罪大罰小不勝其賀矣竊窺古人墨翟拘囚乃有
薄喪孫子失足爰著兵法馬遷腐戮史記百篇賈生
流放文辭卓落不自揆測願麗其後以合孔氏不以
人廢言之志亦將櫟括舊聞總統百氏叙述十經翺
翔蘊輿以成一家之言傳之好事託之高山沒身而
後有甘鮑魚之腥而忘其臭者傳誦其言探察其心

必將爲之撫缶命酒擊節而歌嗚嗚也嗟哉吾鄉異
子闔棺事始定視吾舌存否也僕素迭俠不能及德
欲振謀策操低昂功且廢矣若不託筆札以自見將
何成哉譬若蟬蛻衣裳楚楚身雖不久爲人所憐僕
一日得完首領就柩下見先君子使後世亦知有唐
生者歲月不久人命飛霜何能自戮塵中屈身低眉
以竊衣食使朋友謂僕何使後世謂唐生何素日輕
富貴猶飛毛今而若此是不信於朋友也寒暑代遷
裘葛可繼飽則夷猶饑乃乞食豈不偉哉黃鵠舉矣

華駟奮矣吾卿豈憂戀感豆嚇腐鼠邪此外無他談
但吾第弱不任門戶傍無伯叔衣食空絕必爲流莩
僕素論交者皆負節義幸捐狗馬餘食使不絕唐氏
之祀則區區之懷安矣樂矣尚復何哉惟吾卿察之

答文徵明書

寅頓首徵明足下無恙幸甚昔僕穿土擊革纏鷄握
雉叅襍輿隸屠販之中便投契足下是猶酌湜泚以
餼饕采葛覃而爲絺綌也取之側陋施之廊廟冠劍
之次人以爲不類僕竊謂足下知人比來癡叔未死

狂奴故若遂致足下投杼甚愧甚愧且操竒邪之行
駕孟浪之說當誅當放載在禮典寅固知之然山鵲
暮喧林鴉夜眠胡鷹聳翮於西風越鳥附巢於南枝
性靈旣異趨從乃殊是以天地不能通神功聖人不
能齊物至農種粟女造布各致其長焉故陳張以俠
正而從斷金之好溫荆以偏淳而暢伐木之義蓋古
人忌已齊物等衆辯於穀音出門同人戒伏戎之在
莽也寅束髮從事二十年矣不能剪飾用觸尊怒然
牛順羊逆願勿相異也謹復

嘯旨後序

右嘯旨一編館閣暨鄭馬諸書目皆不著所撰人名氏內述其事始於孫登嵇康先生遂係以內激外激運氣撮唇之法甚詳而於聲則云未譜聲音蓋激氣而成者邵子謂物理無窮而音聲亦無窮惟無窮乃可以配無窮故以音聲起數御天下古今物理之變聲則起於甲而止於庚多良千刀婁宮心之類是也音則起於子而止於戌古黑安夫卜東乃走思之類是也與沙門神珙之法稍異神珙則以內外八攝總

其聲三十六母總其音法雖不同其於音聲則括盡
而無遺矣然有字有聲者雖多而有聲無字者亦爲
不少必皆以翻切得之翻者翻出其音切者切出其
聲如徒公徒丁顛東丁顛謂之翻徒東謂之切也其
他無字之音聲如水聲風聲之類皆可翻切今黃冠
師符呪秘字亦有聲而無字梵門密語若一字呪合
晉林二字爲一呼至有三合四合者彈舌取之而皆
無字及其號召風霆驅役神鬼若運諸掌今嘯亦有
聲而無字豈吾儒感天地贊化育之餘意歟聲雖未

譜其間稱或取聲自上齶出或自舌上出者四聲惟平聲有上下蓋氣自上齶出爲上平聲氣自舌上出爲下平聲上去入聲無上下者反聲故也平聲清而反聲濁竊想嘯之爲聲必出於平而不出於反矣孫嵇仙去遠矣白骨生蒼苔九原不可作安得善嘯之士以譜其聲而習之登泰山望蓬萊烈然一聲林石震越海水起立此亦此生之大快也子儋朱君好古博雅一時俊彥之良無有逾者於僕契分甚厚暇日出是編以相勘校因曰嘯之失其旨也久矣幸存此

編略知梗槩不刊諸梓以傳於世則羊禮俱亾後人
何所考據子盍爲我叙其事於編後以遺同志幸遇
反隅之士衍而習之庶幾復有以嘯名於天下者知
由此書以發其端云

送文溫州序

寅稚冠之歲跌放不檢約衡山文璧與寅齒相儔又
同井閤然端懿自持尚好不同外相方圓而實有墳
簞之美璧家君太僕先生時以過勤居鄉一聞寅縱
失輒痛切督訓不爲少假寅故戒栗強恕日請益隅

座幸得遠不齒之流然後先生復贊拔譽揚畧不置
口先后于邦閭耆老于有司無不極至若引跛繫策
駑駘然是先生於後進也盡心焉耳矣且夫周文之
聖積累仁義詩人詠之曰得四臣而天下附孔子之
教冊籍紀焉曰有顏子季路閔曾游夏之徒而道益
彰今蓬巷之士頌先王守圈模茹麇冠素羹蔡飯脫
粟透迤寬博其異於鼓刀負販之人若芥髮耳不先
有所引擢後有所推戴輔翼其何能自致於青雲之
上傳言曰朋友不信不獲乎上矣此後輩之所以必

仰賴也而爲前輩者道有所論授相與優息而無獨
知無徒之嘆而後輩則高山在瞻有所標的是上下
相成也今之後輩被服姣麗伸眉高論旁視無忌不
復識有前輩之尊與益也是豈長者絕之哉庶後進
之彥以寅觀則知前輩之用心用人也矣今先生出
刺溫以病謝不報赴郡有期既當爲詩以餞敢又書
此以叙寅之所以德先生而無可爲報者

中州覽勝序

吾黨袁臣器少年氣逸溫然玉映葢十室之髦懿也

弘治丙辰五月忽翻然理篙楫北亂揚子歷彭城漸于淮海抵大梁之墟九月來歸乃繪所經歷山川陸并衝隘名勝之處日夕展弄目游其中予忝與鄉曲得藉訪道里宛宛盡出指下蓋其知之素而能說之詳也予聞丈夫之生刻蒿體揉柘幹以麗別室固欲其遠陟遐舉不齷齪牖下也而愿慙者懷田里沒齒不窺闔閭曰世與我違甘與菑木委灰同棄雖有分寸而人莫之知也后世因莫之建白也是余固欲自展以異而類然青袍掩脛馳騫士伍中而身未易

自用也雖然竊亦不能久落落于此臣器新從魏地
來今不知廣陵有中散之遺聲歟彭城項氏之都也
今麋鹿有幾頭歟黃河故宣房之基在否歟大梁墟
中有持孟羹爲信陵君祭與無也臣器其爲我重陳
之余他日當參驗其言

劉秀才墓志銘

蛟龍得雲雨而能澤萬彙者時也君子終困窮而能
守一身者道也語夫詠珪璋以比德指松栢而論材
吾嘗聞斯語矣代豈亾是人哉君諱嘉縉字協中陶

唐氏之後也居乎三代因時易姓故有御龍豕韋唐
杜之號其後定公夏獻公摯父子爲周卿士食采於
劉遂稱氏焉漢室之興封侯王者十有二人皆同姓
也他劉以大儒名世辯說著稱者又莫殫紀暨乎晉
隋蝨斯蕃蟄蟄之孫瓜瓞衍綿綿之蔓氏族之盛莫
與京焉宋德不競天下艸昧家室播越譜牒淪沒君
是爲蘇州人大父敬封承德郎褒碩德也厥攷昌受
大中大夫廣東叅政崇明賢也君誕育洛陽幼習庭
教大哀夙構幾覆厥生一舉明經來游泮水畢藝時

文懷心史學加以情尚風流性不忤物荀君之座三日猶香何郎之姿一拭生白學無不達猶好老莊是以寵辱不驚伏思爲樂少年以范丞相成大墓近先塋常遭發毀作文弔之援筆立成詞不加竄雖老成宿德莫不推其博雅習爲歌詩初擬元白末尚齊梁短章一出時輩競傳至不能爲隱匿病極勞瘁而筆札不去是其勤也家無厚儲而重恤交游是其義也順以格親孝之理也和以處內術之知也方將集百朋之譽乃遽得二豎之痾正謂玉匣難全琉璃易脆

列歲二十有四以弘治四年某月日卒於臯橋故居
沒身之日識與不識莫不躑躅揮涕某年月日葬仰
天山之麓不忘本也子名穉孫襁褓衰經育於令人
顧氏鄙人非角相知童年託愛方始有急鄙人以密
友入問湯藥執手相視潸然泣下及乎易篋鄙人以
君命出卜辭雖不治尚號召鄙人者再焉若有見囑
未及而沒善言不聞此生長恨是知義則友朋情猶
骨肉泰山其頽空歌伐木之詩昊天不弔竟負彈冠
之約其所著詩文二卷蓋亦纂集其昔時之酬答或

傳錄其壁間之咏題也錯玉成器擲金有聲歲月悠
遠散亾是懼敢用鐫石名山散帙所識庶永其傳焉
嗚呼大化有期固識蜉蝣之不永修程頓局豈亾狐
狸之傷類奉撰高躅式慰幽懷其銘曰

華屋失歡笑青原起悲嘆靈風吹寶幡金碗照塵幔
傷春臺之改色悲夜宮之未旦列高誼以豐石期歷
劫以燦爛

劉太僕墓志銘

公諱某字某河南光州人也其先姬姓唐帝之後夏

有劉累氏族權焉公誕育名門實鍾秀質溫恭明允
高朗有融君子豈弟華朴彬彬少聞詩禮之訓長弘
洙泗之學以鄉薦釋褐太平別駕遭父憂去職面墨
未濯重罹大恤哀哀勞瘁鹽酪無啜箠箠寤寐草土
重藁兆宅旣卜塋陵是廬爰封爰樹皆所躬服是以
陶墓翔異常之鳥孔林茂不名之木誠孝所感貞祥
萃焉詔旌公門以表孝異服闋入爲太僕寺丞美風
大振嘉德勵行進階奉政大夫輿言畢頌僉望咸歸
作善無徵哲人其萎卒葬土橋溝之先塋禮也厥嗣

六人或敷仁東土或司憲西臺次亦冠服魏裘場屋
騰進莫不涓涓杜葉敷周道之清陰韡韡棠花曜虞
廷之彩色也共耻瓶罄咸感川流仰止高山戀餘光
之渺渺俾栽樂石表潛德之玄玄銘曰

峩峩劉公於昭令德博文約禮孝思維則風猷高遠
儀範莊翼游藝故園觀光上國明珠無類爲世所珍
良材不器用之於民日居月諸風行政成昊天不弔
橫罹大迤孝矣我公飲糜服土樂樂棘人哀哀嚴父
負塊芳林引息中野嘉木是茂異禽來下 天子有

詔式旌公間入班朝列其德勿渝謔兮不虐踰兮巧
趨大化奄忽投軌泉途蕭蕭白楊戚戚蒿里萱葉朝
摧悲風夜起于嗟我公傷如何矣德音無窮永瞻桑
梓

吳東妻周令人墓志銘

令人諱某字某蘇州雙鳳人也本平公族稱爲周氏
舍勤於趙門推諤諤昌忠於漢廷對期期盛德之後
必有淑人積慶之餘式生良媛令人蕙質外朗不待
學於師氏蘭清內映自能合於女史顰笑亦式纖穠

合度戴媯淑慎日思古人鍾姬明敏皆稱士女及乎
旭日始旦三星在天乃嬪于崑山吳氏焉夫子宜之
有琴瑟之和舅姑稱之盡桑梓之敬豈惟工深絲素
藝殫維組且以禮備蘋蘩宜其家室矣年二十有二
以弘治七年四月十七日寢疾而卒凡歸吳氏十有
九旬粵二十八日壬寅葬于興賢里附先塚也夫彩
雲易散玉簪中折灰酒不靈惟覩障中之匣雨鈴興
感但留巾上之香嗚呼天眷有德柔者必壽顧茲歎
行不至遐齡何哉得非天爽其信神食其言歟段婦

高標餘熾獨傷其年少劉妻有德彥升乃述以貞銘
其銘曰

周本姬姓吳乃子國崇其婚媾偶望齊德坤詞著功
周詩咏色旣宜伯姊尤飾言容人稱郝法尼談謝風
才溢珠瑤操均寒松天道無知碩人期喪晉使遠集
秦鑿徒望香斷銀鑪塵流華帳賓寮倍慘山川增愴
里殞淑德夫失良相百歲之后魂其同葬

徐君墓志銘

夫積德垂裕之謂仁全歸保終之謂智繼志述事之

謂孝放情任好之謂達四者吾於徐君見之君諱某字某山西永年人也烈祖思賢祖仲良父友諒皆純德內華高風外朗相羊泌水寤寐丘園河嶽分靈神祇効祉篤生君子爲鄉具瞻岐嶷天成謙冲氣受悅詩敦禮綜典博文率履不違一諾靡宿早有無恃之戚公靡恤爲哀無歸是悼且太夫人高年在堂君猶觀文周序習禮魯宮感棘心之詩傷愛日之諺遂捐業歸養傳曰孝在養親君以之哉孔懷二三怡怡就慈偕稱周士承承循義並矣殷仁稟命不融成化七

年七月二十七日遇疾而卒得年七十有六娶白氏
再娶程氏子三人鳳毛分丹穴之秀麟角遺甫草之
祥縣特裘羔各行其志以爲懿德亾述鍾鼎奚銘用
是展豐詞於玄室昭懿行於來世詞曰

光光徐君惟德之府周旋中規折亦含矩康莊整駕
孔筵布武夙蹈閔凶其泣沈沈芹宮棄勣萱庭奉歡
兄弟好合聯周並旋天乎傷哉不假其息華堂徹樂
泉臺啟宅雲霧升車青松改色哀孺后昆刻銘慈石
永永不刊昭于千億

許天錫妻高氏墓志銘

令人諱真字閨德吳縣鳳凰鄉人其先出自姜姓鄭
有渠彌齊有黔婁枝布葉分實始宗祧令人早值家
艱過車就聘溫淑閑靜與性俱成歷堂仰侍由房下
撫恭舒並得非儀靡聞及乎傍接妯娌既云覽妻外
應賓客亦稱顛母年非德永命也傷哉春秋二十九
而卒弘治八年歲在乙卯八月而葬悲夫柳轉當途
鴛鴦惜在梁之翼文旆載道蟠龍失隱鏡之姿居懷
宛轉孤女叫號弔客紛紜僮僕嗟嗟於是述德作銘

表於玄廬銘曰

睦睦令人受質自天壺內不驚室外何專壽不因德
福不偏賢之玉焚摧傷復何言引緋同嗟生順歿全
昭茲令名億萬斯年

唐長民壙志

長民余第申之子也母姚氏余宗不繁自曾大父迄
先府君無有支庶余又不育暨有此子也兄弟駢肩
倚之年十二穎慧而淳篤在父母側未嘗仰視跛步
讀書夜必踰甲乙其興亦未嘗至漏盡也有間必詣

余是外更無他適余每心計曰唐氏累世植德耳目
可指摘而言者五代矣閭門巷塗稱爲善士無有間
言天必祐之振起其宗及余領解都下頃以口過廢
擯而猶冀有此子也今不幸以歿又將何所賴也豈
余凶窮惡極敗壞世德而天將翦其宗邪而余束髮
行義壺漿豆羹兄弟歡怡口無莠言行不詭隨仰見
白日下見先人無忝於衷昊天不聰喪我猶子誠爲
善之無徵矣於戲冤哉嗚呼痛哉卜以卒之年正德
戊辰九月內午去死之日凡三月葬城西互里晉昌

舊阡殤之穴陵谷遷移忘銘壙首吮筆命辭涕之無
從銘曰

昊天不聰翦我唐宗寃哉歿也斯童兄第二人將何
從維命之窮

沈隱君墓碣

惟隱君諱誠字希明姑蘇長洲人也體履柔嘉天性
狷潔聰明哲知慈良溫舒學貫列經博綜群言草木
昆蟲大極天文殫究畢該固有遺捐修身以道修道
以仁一芥之微不與不取郡辟賢良色斯而作上不

責援下不號助故香草能揚芬於尺澤葛累其委榮
於中田也乃修困亨之道操獨行之志茂嘉貞之節
達圖數之變懿德無涯淵仁靡極年七十寢疾不祿
弘治六年五月乙卯卒前期挾日悉燬所著書牘啟
予之夕怡然無辭斜幅歛形酌糜實口所謂放光彩
以自沈樂天命而無疑者已友生門徒哀德不耀悼
道無聞以爲沒身不稱聖哲之耻厚德流光古昔同
云所以召公沒而周鼎成季子葬而孔碑卓攷行定
名謚曰靜通乃與援翰述踪傷蠖屈於玄壤作銘慰

往刊鴻伐於玄珪其辭曰於穆隱君昭慈德芳繼聖
作哲休有烈炎狷潔自天蹈義履仁州司貢登移孝
就忠車未竟途翻然改翔乃執其雌皐白允方泚水
洋洋驩愉不怠耽經咀義衍衍閭閻童冠六五區別
以分而珪而璋視頓亦揚皇矣上帝賦職不平大命
傾摧神遷魄藏念彼恭人中心永傷立言紀行先民
所戒刊勒嘉石貽于無疆永矢勿虧支百蕃昌

齊雲巖紫霄宮玄帝碑銘

乾坤定位二儀開五劫之端人鬼分形五嶽鎮九州

之地東溟銀榜標題長子之宮西海玉門實聚百神
之埜皆所以節宣寒暑鼓舞陰陽萬物賴之以生成
四民順之而動止兵戈藉之而底息穀粟因之而豐
登玄天元聖玉虛師相仁威上帝蕩魔天尊者顯帝
之神水德繼王在先天則正位乾符御北斗則斟酌
元氣職領紫薇之右垣則並天乙太乙之座宿列虛
星之分埜則摠司命司祿之權判當開泰之中天啟
聖靈之孕幽明叶相上下同流凝二五之精以有生
建三一之道以度世誕聖王宮出胎母脇寶炁所照

三辰爲之失色天靈護持六種爲之震動洎乎髫年
辭親就道東遊震土元君指迷受錫劍於天帝悟磨
杵於神姥折梅枝而寄棚升霄峯以圓功虎將護壇
龍神捧足於是叩金扉而退升當玉階而稽首受命
上清敷惠下土分判人鬼資大禹鑄鼎之功馘除妖
魔繼黃帝鳴角之戰較蹟天曹復居坎位屢旗捧劍
乾樞開太帝之宮玄龜赤蛇坤軸闢玄都之府歷朝
顯應有感必通恭惟我 太祖高皇帝德符天地功
配唐虞用夏變夷易胤以治偃武修文而萬國咸寧

燔柴瘞玉而百神歆享歷數在躬卜宅中夏誕及
太宗皇帝纘承祖攷欽若昊天實藉神威以翼聖躬
爰由冥力以靖多難風行電掃而天日開明虎嘯龍
吟而江山變色蓋精靈通乎變化誠慶達乎神祇也
是以勅命重臣建宮福地丁夫百萬星霜再周金碧
極輝煌之盛香火盡嚴奉之誠蓋所以答神貺宅威
靈今之泰嶽中和山是也是以民莫不敬且信有感
必通離宮別館遍於天下名山大川尤多顯靈蓋神
藉山川之靈氣乃可以應億兆之禱求故其居處無

常周遊靡止若夫互人之國上下于天女媧之墓浮
沈于水神化者不可以理測其端妙應者不可以言
達其旨是以齊雲巖紫霄崖有玄帝之行宮焉其創
始落成別有記序養素道人汪太元以僕業工佔俾
託戴生昭來乞序文竊以爲殷薦望秩帝王所以表
天地山川禴祀蒸嘗億庶所以報祖宗神鬼奠安宗
社庠宅家邦厥旨微矣矧夫玄天元聖作鎮北極應
化本朝統五帝之尊履九宮之始除邪鎮惡降福復
災爰建行宮允安兆姓也僕雕虫末學難盡揄揚草

芥微材豈能著述消埃無益於山海螢爝奚補於日月吮毫增悚撫案知慙薰沐以饜斯文稽首系之以頌頌曰

玄天元聖神威上帝作鎮北極斟酌元氣五雷都司九天奕使七曜旋時五福治世平安水土調攝神靈展旗捧劍掣電揮霆虛皇勅命至德實凝敷惠下土兆宅上清赤蛇玄龜將列水火福善禍淫月右日左先天治乾面明向午安定山海亘及今古恭惟我朝太祖太宗惟神輔弼國祚無窮名山大川爰建琳宮

金銀昭耀珠碧輝崇再拜稽首小子作頌上述威靈
下贊神用磨礪磔楚刊鑄麟鳳百萬斯年於昭示衆

祭妹文

嗚呼生歿人之常理必非有賴而能免者惟黃耆令
終則亦歸責于天而不爲之寃隱然疾痛之心久亦
爲之漸釋也吾生無他伯叔惟一妹一弟先君醜寅
之昏且第猶穉以妹幼慧而溺焉迨於移牀懷爲不
置此寅沒齒之疚也爾來多故營喪辨官備歷艱難
扶攜窘厄旣而戎疾稍舒遂歸所天未幾而內艱作

弔赴繼來無所歸咎吾於其歿少且不俶支臂之痛
何時釋也今秋爾家襲作著龜以有此兆宅來朝駕
車幽明殊途永爲隔絕有是庶物用爲祖餞爾其有
靈必歆吾物而悲吾辭也於呼尚饗

唐伯虎先生集卷下

散